

ЭРДЭНЭ РЕСУРС 2021 ОНЫ САНХҮҮГИЙН ТАЙЛАН, ХӨНДИЙ АЛТНЫ ДҮҮРГИЙН ТУХАЙ ТАНИЛЦУУЛЛАА

Хэвлэлийн мэдээ

Нова Скошиа муж, Халифакс хот

2022.03.10

Эрдэнэ Ресурс Девелопмент Корпораци (TSX:ERD; MSE:ERDN) ("Эрдэнэ Ресурс" эсвэл "Компани") нь 2021 оны 12 сарын 31-нд дуусгавар болсон санхүүгийн болон үйл ажиллагааны тайлан, Хөндий Алтны Дүүрэг ба Баян Хөндий Алтны Төслийн ("Баян Хөндий" эсвэл "БХ") хөгжүүлэлтийн мэдээлэл хүргэж байна. SEDAR болон компанийн вебсайт дээр байршуулсан 2021 оны санхүүгийн тайлан, үйл ажиллагааны тайлан ("MD&A" буюу "Удирдлагын хэлэлцүүлэг ба дүн шинжилгээ") нь энэхүү хэвлэлийн мэдээний салшгүй нэг хэсэг болно.

Тодруулга:

Эрдэнэ Ресурсийн ерөнхийлөгч, гүйцэтгэх захирал Петер Акерли хэлэхдээ: "Бид 2021 онд Баян Хөндий алтны төслийг хөгжүүлэх, мөн Хөндий Алтны Дүүргийг тэлэх хоёр стратегийн зорилтын дагуу амжилттай ажилласан. Зүүн-Өмнөд Улаан шинэ нээлт болон Хар Морийн Дэл дэх 1.5 км алтны хүдэржсэн трендийг илрүүлсэн нь Хөндий Алтны Дүүрэг дэх Хөндий-Улаан системийн хэтийн төлөвийг харуулж байна. Эрдэнэ Ресурс нь 2022 онд нөөцийн хэмжээг 2 сая унц алтад хүргэх, ирээдүйд нөөцийг нэмэгдүүлэх боломжийг судлахаар төлөвлөн ажиллаж байна."

"Бид Ковид-19 цар тахлаас үүссэн тодорхойгүй байдлуудыг үл харгалзан Баян Хөндийн бүтээн байгуулалтын шийдвэрийг гаргахад зориулж бэлтгэл ажлуудыг тууштай ахиулж байна. Компани нь өнгөрсөн 12 сарын хугацаанд төслийн загварчлалыг 90% гүйцэтгэж, БОНБНУ зэрэг голлох тусгай зөвшөөрлүүдийг авахаас гадна Канадын Экспорт Хөгжлийн Агентлаг болон бусад санхүүгийн байгууллагатай хийх төслийн санхүүжилтийн ажлуудыг ахиулан ажиллаж байна. Компани ирэх саруудад төслийн талбайд бүтээн байгуулалтын бэлтгэл ажлыг эхлүүлж, 2022 оны хагаст эрчимжүүлэхээр төлөвлөсөн. Түүнээс гадна Компани нь Ковид-19 цар тахлын нөлөөллөөс үүдэн гол тоног төхөөрөмжүүдийн зардал, нийлүүлэлтэд үүсэж болзошгүй эрсдэлийг хянан, ирэх саруудад төсөл хөгжүүлэлтийн төлөвлөгөө болон төсвийн талаар дэлгэрэнгүй мэдээлэл өгөхөөр төлөвлөж байна."

2021 оны онцлох үйл явдлууд:

Хөндий Алтны Төсөл–Эрдэнэ Ресурсийн 100% эзэмшил

- Баян Хөндий Алтны Төслийн бүтээн байгуулалтын бэлтгэл ажлууд эхэлсэн:

- Боловсруулах үйлдвэр ба уурхайн бусад дэд бүтцийн нарийвчилсан зураг төсөл, инженерчлэлийн ажлууд 90% гүйцэтгэлтэй байна.
- Хагас өөрөө нунтаглах тээрэм, бөмбөлөгт тээрэм, алтны өрөө болон угаах дамжлагын тоног төхөөрөмжийн гэрээг хийсэн.
- Бүтээн байгуулалтын шийдвэр гаргахаас өмнө боловсон хүчнийг сонгон шалгаруулах, төслийн гүйцэтгэлийн төлөвлөгөө, гарын авлагыг боловсруулж эхэлсэн.
- Голлох механик болон барилгын ажлын багцыг санал хүлээн авах хүсэлтүүд гаргасан.
- Уурхайн ус хангамжийг баталгаажуулах судалгааг эхлүүлсэн бөгөөд үр дүн нь 2022 оны 2-р улирлын сүүлээр гарна.
- Орон нутгийг дэмжих хөтөлбөрүүдийг хэрэгжүүлж байна:
 - Орон нутгийн засаг захиргааны байгууллагатай 2021 оны 3-р улиралд Хамтын ажиллагааны гэрээг байгуулсан нь орон нутгийн хөгжлийн хөтөлбөрүүд, цар тахлын эсрэг хариу арга хэмжээнүүдийг дэмжихэд чиглэсэн.
 - Барилга, ашиглалтын явцад иргэдийг ажилд бэлтгэх зорилгоор орон нутгийн 120 гаруй иргэнд хөдөлмөрийн чиглэл олгох сургалт, бэлэн байдлын сургалт зохион байгуулсан.
 - 2022 оны 1-р сараас орон нутгийн ургамалжуулах хөтөлбөрийг эхлүүлсэн.
- Уурхайн хөгжүүлэлтийг эхлүүлэхэд шаардлагатай захиргааны байгууллагуудын зөвшөөрлүүдийг авч байна:
 - 2021 оны 11 сард Монгол Улсын Байгаль Орчин, Аялал Жуулчлалын Яам нь төслийн Байгаль орчинд нөлөөлөх байдлын нарийвчилсан үнэлгээ (БОНБНУ)-г баталсан.
 - Анхан шатны бүтээн байгуулалт болон байгууламжийн нарийвчилсан зураг төслийн хяналт амжилттай гүйцэтгэж байна, есөн байгууламжийн зураг төсөл батлагдсан бөгөөд 2022 оны 2-р сард эдгээрийн 8 барилга, байгууламжийн барилгын зөвшөөрөл авсан.
- Баруун Страйкер, Страйкер, Мидфийлд болон Хойд Мидфийлд бүсүүдэд хийсэн 2020 оны өрөмдлөгийн үр дүнгүүдийг өнөөгийн алтны үнэд тулгуурлан, Баян Хөндий нөөцийн тооцооллыг боловсруулсан:
 - 2021 оны Баян Хөндийн нөөцийн тооцооллын баттай нөөц нь 61,700 унц алт (36%), бодитой нөөц нь 2,700 унц алтаар (1%) нэмэгдэв.
 - 2020 оны нарийвчилсан ТЭЗҮ-д тодорхойлсон уурхайн олборлох боломжтой баттай нөөцийн хэмжээ 47,500 унц алт (28%) -аар нэмэгдүүлсэн.
 - 1.0 г/т алтны захын агуулгаар тооцоолсон дундаж алтны агуулга 6.59 г/т байгаа нь Баян Хөндий ордын өндөр агуулгыг дахин баталгаажууллаа.

- 2020 оны өрөмдлөгийн үр дүнд Мидфийлд болон Хойд Мидфийлд бүсэд газрын дөт гүнд алтны эрдэсжилтийг нээснээр загварчилсан эрдэсжсэн бүсийг тэлэх боломжийг харууллаа.

Хайгуулын хөтөлбөр

- Баян Хөндий төсөлтэй зэргэлдээ орших зүүн өмнөд Улаан, Хар Морийн Дэл бүсэд нийт 19,706 метрийн 154 цооног өрөмдсөнөөр 2021 оны хайгуулын хөтөлбөрийг эцэслэсэн.
 - Хөндий-Улаан гидротермаль хувирлын тренд нь хэдэн сая алтны нөөц бүхий ордыг агуулах боломжтой гэсэн Компанийн таамгийг дэмжиж байна.
 - Компани 2022 оны эцэст нийт нөөцийг 2 сая унцад хүргэхээр төлөвлөсөн.
- Хар Морийн Дэл бүсэд 1.5 км хувирлын тренд тодорхойлж, газрын дөт гүнд, өндөр агуулга бүхий хүдэржилт үргэлжилж байгааг баталгаажуулсан нь хойд, өмнө зүгт болон гүндээ нээлттэй.
 - Хөндий Алтны Дүүрэгт газрын дөт гүнд, өндөр агуулга бүхий исэлдсэн алтны хүдэржилт байх боломжтойг харууллаа.
 - Хар Морийн Дэл дэх 2021 оны хөтөлбөрт 11,608 метрийн турш 126 цооног өрөмдсөн бөгөөд онцлох үр дүнд:
 - AAD-126 цооногийн 10 метрээс эхлэн 5.63 г/т алтны агуулга бүхий 30 метрийн интервал огтолсон бөгөөд түүнд цооногийн 26 метрээс эхэлсэн 24.12 г/т алтны агуулга бүхий 6 метрийн интервал багтаж байна.
 - ADD-137: Цооногийн 1.5 метрээс эхлэн 9.4 г/т алтны агуулга бүхий 24.5 метр огтолсонд 16.1 г/т алтны агуулга бүхий 13.5 метрийн интервал багтсан.
 - ADD-138: Цооногийн 18 метрээс эхлэн 6.1 г/т алтны агуулга бүхий 25 метр огтолсонд 17.1 г/т алтны агуулга бүхий 8 метрийн интервал багтсан.
 - AAD-177: Цооногийн 1 метрээс эхлэн 11.4 г/т алтны дундаж агуулга бүхий 23 метр огтолсонд 32.2 г/т алтны агуулга бүхий 8 метрт 59.8 г/т алтны агуулга бүхий 4 метрийн интервал багтсан.
 - AAD-178: Цооногийн 11 метрээс эхлэн 42.8 г/т алтны дундаж агуулга бүхий 15 метр огтолсонд 123.5 г/т алтны агуулга бүхий 5 метрт 160.4 г/т алтны агуулга бүхий 3 метрийн интервал багтсан.
 - 2021 оны хөтөлбөрийн 126 цооногоос 106 цооногт аномаль алтны хүдэржилт огтолсон (≥ 0.1 г/т алт) бөгөөд үлдсэн 20 цооногт сурьма, молибден, хүнцэл зэрэг аномаль индикатор элементүүдийн утга илэрсэн.

- Баян Хөндий алтны ордоос баруун зүгт 300 метрт Улаан тусгай зөвшөөрлийн зүүн өмнө талбайд хийсэн өрөмдлөгийн хөтөлбөрөөр Хөндий Алтны Дүүрэгт огтолсон хамгийн өргөн алтны интервалыг илрүүлсэн.
 - Зүүн-Өмнөд Улаан талбайн алтны хүдэржилт нь 200*250 метрийн талбайд, 460 метрийн гүнд үргэлжилж байгаа бөгөөд хойд, баруун зүгт болон гүндээ нээлттэй.
 - Хэд хэдэн цооног 3 г/т алтны дундаж агуулга бүхий зузаан бүсүүд (30-75 метр)-ийг огтолсон.
 - 2021 онд Улаан талбайд хийсэн хайгуулын хөтөлбөрөөр нийт 8,098 метрийн 28 цооног өрөмдсөн бөгөөд онцлох мэдээллийг доор тусгав:
 - UDH-10 цооногийн 92 метрийн гүнээс 0.98 г/т алтны агуулга бүхий 258 метр интервал огтолсон нь 99 метрээс эхлэн 3.77 г/т алтны агуулга бүхий 40 метрийн интервал агуулж байна.
 - UDH-14 цооногийн 188 метрээс эхлэн 1.07 г/т алтны агуулга бүхий 217 метр интервал огтолсон нь 3.55 г/т алтны агуулга бүхий 53 метрийн интервал агуулсан.
 - UDH-15 цооногийн 97 метрээс эхлэн 0.79 г/т алтны агуулга бүхий 364 метр интервал огтолсон нь 1.98 г/т алтны агуулга бүхий 91 метр агуулж байна.
 - UDH-21 цооногийн 115 метрээс эхлэн 3.19 г/т алтны агуулга бүхий 77 метр огтолсон нь 8.74 г/т алтны агуулга бүхий 27 метрийн интервал агуулж байна.
 - UDH-22 цооногийн 85 метрээс эхлэн 3.11 г/т алтны агуулга бүхий 65 метрийн интервал агуулсан 1.71 г/т алтны агуулга бүхий 152 метр огтолсон.

Компанийн тухай

- Канадын Экспорт Хөгжлийн Агентлагтай Баян Хөндий Алтны Төслийн санхүүжилттэй холбоотой нарийвчилсан судалгааг гүйцэтгэж байна.
 - \$55 сая ам.доллар хүртэл зээлийн санхүүжилтийг төвлөрүүлэх зорилт бүхий баримт бичигт гарын үсэг зурсан.
 - 2022 оны 1-р сард төслийн судалгааны тайланг хүлээн авсан бөгөөд 2021 оны 8-р сард техник, байгаль орчин болон нийгмийн тайлангийн төслийг хүлээж авсан.
 - 2022 оны хагас жилд эцэслэхээр зээлийн нөхцөл болон баримт бичгийг боловсруулах ажлуудыг гүйцэтгэж байна.
 - Дээрх үйл ажиллагаатай зэрэгцэн нэмэлт зээлийн судалгааг Монгол Улсын санхүүгийн байгууллагууд гүйцэтгэж байна.
- 2021 оны 12-р сард Баян Хөндий төслийн татварын тогтворжуулалтын гэрчилгээг авсан.

- Энэ нь Баян Хөндий алтны төсөлд ногдуулах татварын хэмжээг хөрөнгө оруулалт хийсэн өдөр мөрдөгдөж байсан эсвэл одоо хүчин төгөлдөр мөрдөгдөж буй татварын хувь хэмжээнээс доогуур тогтоодог.
- 2021 оны 10-р сард Монголын Хөрөнгийн Бирж дээр 5 сая ам.долларын санхүүжилтийг татан төвлөрүүлсэн.
 - Монголын стратегийн хөрөнгө оруулагчид болон олон нийтээс 1,867 захиалга хүлээн авсан.
 - Хувьцааны захиалга 46%-иар давж биелсэн бөгөөд Монгол Улсын хууль, журмын дагуу хувь тэнцүүлэн биелүүлсэн.
 - Компани нь Монголын болон Торонтогийн Хөрөнгийн Биржүүд дээр давхар бүртгүүлсэн ганц компани хэвээр байна.
 - 2021 онд 7,544,750 варрант хэрэгжүүлснээр 2.3 сая канад долларын хөрөнгө босгосон.
- Зуун Мод / Хөвийн Хар молибден-зэсийн төслийн стратеги, техникийн үнэлгээг эхлүүлсэн.
 - RPMGlobal нь шинэчилсэн техникийн судалгаа, эдийн засгийн тооцооллыг 12-р сарын дундуур хүлээлгэн өгсөн.
 - Энэхүү үнэлгээ нь борлуулалт, түншлэл, хуваах зэрэг хэд хэдэн арга замыг тодорхойлж, төслийн үнэ цэнийг оновчлох зорилготой.
- 2021 оны 12 сарын 31-ний өдөр дуусгавар болсон жилийн эцэст Компанийн нийт алдагдал \$5,570,523 байсан ба 2020 оны мөн үед \$13,116,358 байв.
 - Капиталжуулсан зардлыг оролцуулсан хайгуул болон үнэлгээний өртөг нь 2021 оны 12 сарын 31-ний байдлаар \$12,391,867 байсан нь 2020 оны мөн үеийн \$9,276,028-тай харьцуулахад өссөн үзүүлэлт юм. Компани 2021 онд 20,000 метрийн өрөмдлөгийн хөтөлбөр хэрэгжүүлсэн бөгөөд 2020 онд 15,000 метрийн өрөмдлөгийн хөтөлбөр хэрэгжүүлсэн. Түүнээс гадна Баян хөндий алтны төслийн нарийвчилсан инженерчлэл, загварчлалын судалгаа, бүтээн байгуулалтын бэлтгэж ажлууд (урт хугацааны худалдан авалтын урьдчилгаа зэрэг) зэрэг нь өнгөрсөн оны нарийвчилсан ТЭЗҮ, нарийвчилсан инженерчлэл, загварчлалын судалгааны зардлаас өссөн. Мөн оролцогч талуудтай хамтран ажиллах зардлууд өссөн нь 2021 онд Баян Хөндий алтны төслийн орон нутгийн захиргааны байгууллагатай Хамтын ажиллагааны гэрээ ("LCA")-г байгуулсантай холбоотой.
 - Компанийн захиргаа, удирдлагын зардал нь 2021 оны 12 сарын 31-ний байдлаар \$1,973,800 байсан нь 2020 оны мөн үеийн \$1,868,905-тай харьцуулахад өссөн үзүүлэлт юм. Энэ нь Баян Хөндий алтны төслийн хөгжүүлэлт болон санхүүжилттэй холбоотойгоор захиргааны цалин хөлс болон мэргэжлийн үйлчилгээний төлбөр нэмэгдсэнтэй холбоотой.
 - Өнгөрсөн жилийн бэлэн бус бодит үнэ цэнийн зардал \$8,412,081 болон хүүгийн зардал \$1,661,960 нь 2020 оны 10 сард хөрвүүлсэн Европын Сэргээн Босголт, Хөгжлийн Банк ("EBRD")-ны хөрвөх нөхцөлтэй зээлтэй

холбоотой. ЕСБХБ нь Эрдэнэ Ресурсийн хамгийн том хувьцаа эзэмшигчдийн нэг болсон.

Ковид - 19

2020 оны нэгдүгээр сараас эхлэн Монгол Улсын Засгийн газар олон улсад зорчих иргэдийн хөдөлгөөн, бүх шатны хичээл сургалтын үйл ажиллагааг хязгаарлах, олон нийтийг хамарсан үйл ажиллагааг түр хугацаагаар зогсоох зэргээр иргэдээ цар тахлаас хамгаалах арга хэмжээг үр дүнтэйгээр хэрэгжүүлсэн. 2020 оны 3-р сараас эхлэн Канад ба бусад улсын засгийн газрууд дээрхтэй ижил хязгаарлалтуудыг хэрэгжүүлж эхэлсэн. 2020 оны 11 сард Монгол Улсад цар тахал голомтлон тархсанаас үүдэн Монгол Улсын Засгийн газар дотоодын хөл хөдөлгөөн болон бараа материалын тээвэрлэлтэд хязгаарлалт хийсэн. 2021 оны нэгдүгээр улирлын дунд үеэс хязгаарлалтыг сулруулсан боловч бүртгэгдсэн тохиолдлуудын тоо нэмэгдсэний улмаас 2021 оны нэгдүгээр улирлын сүүлээр урьдчилан сэргийлэх арга хэмжээг хэрэгжүүлж эхэлсэн.

2021 оны 3-р сард Эрдэнэ Ресурсийн төслүүд байрладаг Баянхонгор аймагт Ковид-19 -ийн халдварын анхны тохиолдлыг мэдээлж, аймаг руу ирж очих болон аймаг доторх хөдөлгөөнд хязгаарлалт тогтоосон. 2021 оны 6-р сарын сүүлд Эрдэнэ Ресурсийн үйл ажиллагаа эрхэлдэг Баянхонгор аймаг болон Шинэжинст суманд Ковид-19-ийн халдварын тоо нэмэгдсэнээр хорио цээр, хязгаарлалтын дэглэм тогтоосон. Компани нь энэхүү хязгаарлалтын дэглэмийн хүрээнд 6 сарын сүүлээс эхлэн хайгуулын ажлаа түр хугацаанд зогсоосон бөгөөд 2021 оны 8 сараас эхлэн Компанийн ажилтнууд болон туслан гүйцэтгэгч компаниуд хайгуулын хөтөлбөрүүдийг үргэлжлүүлэн хэрэгжүүлж эхэлсэн. Өнөөг хүртэл Ковид-19-өөс шалтгаалсан хязгаарлалт ахиж хийгдээгүй. Түүнээс гадна, 2021 оны 3-р улирлаас эхлэн Канад болон олон улсын ажилтнууд, зөвлөхүүд Монгол Улсад томилолтоор ажиллаж эхэлсэн. 2022 оны 2-р сарын 14-ний байдлаар Монгол Улс гадаадын вакцинд хамрагдсан жуулчдад хилээ бүрэн нээсэн бөгөөд Компанийн ажилтан, гүйцэтгэгч компаниуд аливаа хүндрэлгүй зорчих боломжтой болсон.

Монгол Улс БНХАУ-ын хилийн хориг Ковид-19-өөс шалтгаалан тодорхой хэмжээнд байсаар байна. Хилийн хориг нь Баян Хөндий алтны төслийн бүтээн байгуулалтад шаардагдах аж үйлдвэрийн болон өргөн хэрэглээний барааны хүртээмж, үнэд нөлөөлсөн. Хэдийгээр Ковид-19-ийн компанийн үйл ажиллагаанд үзүүлэх нөлөөлөл өнөөг хүртэл бага байгаа ч ирээдүйд Ковид-19-өөс үүдэн Баян Хөндий алтны төслийн хөгжүүлэлт хойшлох эсвэл зардал нэмэгдэх боломжтой. Компани нь нөхцөл байдалд хяналт тавьж, Баян Хөндий алт төслийн барилгын ажлын хуваарь, төсөвт үзүүлэх нөлөөллийн үнэлгээг хийж байна. Эрдэнэ Ресурс нь Монгол Улсад бараа бүтээгдэхүүн бэрхшээлгүй нийлүүлэлт хийх хүртэл бүтээн байгуулалтын ажлыг бүрэн хүчин чадлаар эхлүүлэхгүй байхаар төлөвлөж байна. Компанийн үйл ажиллагаа болон Баян Хөндий алтны төсөл хөгжүүлэлтэд Ковид-19-ийн үзүүлэх нөлөөллийн талаар дэлгэрэнгүй мэдээллийг тухай бүрт өгөх болно.

Эрдэнэ Ресурс нь Монгол, Канадын эрх баригчидтай хамтран ажиллаж, ажилчид, Компанийн үйл ажиллагаа эрхэлж буй орон нутгийн иргэдийн эрүүл мэндийг хамгаалах, хяналтыг хэрэгжүүлэх чиглэлээр ажиллаж байна.

Мэргэшсэн этгээд (геологч)

Петер Далтон (Peter Dalton) нь Компанийн ахлах геологич (P.Geo, Nova Scotia) бөгөөд NI 43-101-т заасан мэргэшсэн этгээд ба техникийн мэдээллийг Эрдэнэ Ресурсийн зүгээс хянан баталгаажуулсан болно.

Эрдэнэ Ресурсийн тухай

Эрдэнэ Ресурс Девелопмент Корпораци нь Монгол Улсад суурь болон үнэт металлын хайгуул, төсөл хөгжүүлэлтийн үйл ажиллагаа эрхэлдэг Канад Улсад бүртгэлтэй хайгуулын компани. Компани нь Монгол Улсын баруун урд бүсэд 2 хайгуулын, 3 ашиглалтын тусгай зөвшөөрлийг эзэмшдэг бөгөөд эдгээр хайгуулын бүсэд хийсэн судалгааны үр дүнд Хөндий Алтны Дүүргийг нээн илрүүлсэн. Эрдэнэ Ресурс Девелопмент Корпораци нь Торонто болон Монголын хөрөнгийн биржүүд дээр бүртгэлтэй. Компанийн тухай дэлгэрэнгүй мэдээлэлтэй Компанийн вебсайт www.erdene.com -оос танилцах боломжтой. Компанийн талаарх чухал мэдээллүүд нь зөвхөн Компанийн вебсайтаар дамжин хүрдэг тул хөрөнгө оруулагчид вебсайтаар дамжуулан бодит мэдээлэл авахыг зөвлөж байна.

Урьдчилсан таамаглал

Зарим мэдээллүүд нь Үнэт цаасны хуулийн хүрээнд урьдчилсан таамаглалуудыг агуулсан болохыг үүгээр мэдэгдэж байна. Урьдчилсан таамаглал нь урьд болж байсан болон ирээдүйд болох бодит баримт биш ба зөвхөн ирээдүйн төлөвлөгөө, стратеги, төсөл, нөхцөл байдалд тулгуурласан үзэл баримтлал, магадлал болон таамаглал болно. Энэхүү таамаглалууд нь тодорхой үндэслэлд тулгуурласан боловч баталгаа биш юм. Компанийн үйл ажиллагаа нь олон хүчин зүйлээс шалтгаалах бөгөөд зарим хүчин зүйлс нь Компанийн хяналтаас давсан байх магадлалтай ирээдүйд учирч болох хүчин зүйлс юм. Материаллаг өөрчлөлт үзүүлэх боломжтой хүчин зүйлсэд эрдсийн зах зээлийн үнэ, хайгуулын үр дүнгүүд, бизнесийн болон зах зээлийн орчин, эдийн засгийн байдал болон санхүүжилт, хөрөнгө босголт зэрэг орно. Дээр дурдсан мэдээллүүд нь ирээдүйд өөрчлөгдөн хувирах магадлалтай. Компани нь Үнэт цаасны хуульд өөрөөр заагаагүй тохиолдолд Урьдчилсан таамаглалыг өөрчлөн, шинэчлэх үүрэг хүлээхгүй.

Энэхүү хэвлэлийн мэдээ нь англи хэл дээр бэлтгэгдсэн хэвлэлийн мэдээний орчуулга болно. Англи, монгол хувилбаруудын хооронд зөрүү эсвэл зөрчилдөх зүйл гарвал англи хэл дээрх хувийг мөрдөнө.

ЭНЭХҮҮ МЭДЭЭЛЛИЙГ ОЛОН НИЙТЭД ТАНИЛЦУУЛАХАД ЯМАРВАА НЭГЭН ЗАСАГ ЗАХИРГААНЫ БАЙГУУЛЛАГА ЗӨВШӨӨРСӨН, ҮЛ ЗӨВШӨӨРСӨН МЭДЭГДЭЛ ХИЙГЭЭГҮЙ.

Холбоо барих:

Петер К. Акерли, Ерөнхийлөгч болон гүйцэтгэх захирал
Роберт Женкинс, Санхүү хариуцсан захирал

Утас: (902) 423-6419
И-мэйл: info@erdene.com
Twitter: <https://twitter.com/ErdeneRes>
Facebook: <https://www.facebook.com/ErdeneResource>
LinkedIn: <https://www.linkedin.com/company/erdene-resource-development-corp-/>
YouTube: <https://www.youtube.com/channel/UCILs5s9j3SLmya9vo2-KXoA>